



04.09.2015

აგულაშვილი: „ნენსკრაზე“ დადებითი დასკვნა გაიცემა, თუ ჩვენს მოთხოვნებს გაითვალისწინებენ

ახალი ამბები



„ლიბერალი“

შეუერთდი განხილვას

ამავე თემაზე

ნებართვის არქონის მიუხედავად, „ნენსკრა ჰესის“ მშენებლობის მოსამზადებელი სამუშაო იწყება

„ნენსკრა ჰესზე“ დადებითი ეკოლოგიური დასკვნა გაიცემა იმის შესაბამისად, თუ ჩვენი სპეციალისტების მოთხოვნები იქნება გათვალისწინებული, - ამის შესახებ გარემოსა და ბუნებრივი რესურსების დაცვის მინისტრმა გიგლა აგულაშვილმა განაცხადა.

რაც შეეხება იმას, რომ გარემოზე ზემოქმედების შეფასების ანგარიშზე დადებითი დასკვნის მიუხედავად, საპარტნიორო ფონდმა ჰესის მშენებლობისთვის მოსამზადებელი

სამუშაოები დაიწყო, აგულაშვილი ამბობს, რომ მათთვის ამით არაფერი შეცვლილა.

„ჩვენ განვაგრძობთ სტანდარტულ პროცედურებს გზშ-ს ანგარიშთან დაკავშირებით. ჩვენთვის ამით არაფერი შეცვლილა. კანონით ჩვენთვის დაკისრებულ მოვალეობებს შევასრულებთ. რაც შეეხება განცხადებებს, რამდენადაც ჩვენთვის ცნობილია, საუბარია მოსამზადებელი სამუშაოების დაწყებაზე“, - აცხადებს აგულაშვილი.

მინისტრის თქმით, ის რომ საპარტნიორო ფონდი დარწმუნებულია, რომ დადებით ეკოლოგიურ დასკვნას მიიღებს, ეს ნიშნავს იმას, რომ ისინი გეგმავენ, შეასრულონ მოთხოვნები, რომლებიც მანამდეც არსებობდა.

„საპარტნიორო ფონდში“ „ლიბერალს“ უთხრეს, რომ გარემოზე ზემოქმედების შეფასების (გზშ) გადამუშავებული ანგარიში საბოლოო დასკვნის გასაცემად გარემოს დაცვის სამინისტროსა და ეკონომიკის სამინისტროშია წარდგენილია.

მათი თქმით, ძირითადი სამუშაოების დაწყება 2016 წლიდანაა დაგეგმილი. ფონდის ინფორმაციით, მშენებლობის ნებართვა 2015 წლის ოქტომბრის ბოლომდე გაიცემა. როგორც ფონდში აცხადებენ, ისინი დარწმუნებულნი არიან, რომ მშენებლობის ნებართვას მიიღებენ.

რაც შეეხება წინასამობილიზაციო სამუშაოს დაწყებას, ფონდში ამბობენ, რომ ამგვარ სამუშაოებს მშენებლობის ნებართვა არ სჭირდება.

„ლიბერალთან“ საუბრისას „მწვანე ალტერნატივის“ წარმომადგენელი დავით ჭიპაშვილი აღნიშნავს, რომ სამობილიზაციო სამუშაოები პროექტის ნაწილია და მშენებლობის ნებართვის გაცემამდე მსგავსი სამუშაოების დაწყება უკანონოა.

იმას, რომ ფონდში დარწმუნებულები არიან, მშენებლობის ნებართვას 2015 წლის ოქტომბრის ბოლომდე მიიღებენ, ჭიპაშვილი სამინისტროებში გადაწყვეტილების მიმღებ პირებზე პირდაპირ ზეწოლად აფასებს.

ნენსკრას ჰიდროელექტროსადგურის პროექტის საიმპლემენტაციო ხელშეკრულებათა პაკეტის ხელმოწერის ცერემონია 31 აგვისტოს გაიმართა, რომელსაც საქართველოს პრემიერ-მინისტრი ირაკლი ღარიბაშვილი დაესწრო.

„მინდა გითხრათ, რომ პროექტთან დაკავშირებით ყველა ტექნიკური, ფინანსური და იურიდიული დეტალი უკვე შეთანხმებულია და სამშენებლო კომპანია უახლოეს დღეებში დაიწყებს სამობილიზაციო სამუშაოებს მშენებლობისათვის. ჰესის სიმძლავრეა 280 მეგავატი. მისი პოტენციური წლიური გამომუშავება იქნება 1.2 მილიარდ კილოვატ საათი. სადგური ელექტროენერჯის გამომუშავებას 2019 წლიდან დაიწყებს და 2021 წელს პროექტი საბოლოოდ დასრულდება“, - აღნიშნა საქართველოს პრემიერ-მინისტრმა.